

Proceso di restauracion di Cas Henriquez a cuminza!



ORANJESTAD (AAN) -- Ministro Lily Beke a duna DIARIO un splicacion extenso tocante e proceso di restauracion di monumentonan nacional, cu ta tumando lugar den ciudad y na otro areanan di Aruba.

EDIFICIO HENRIQUEZ

E proceso di restauracion di Cas Henriquez ta den marcha, y manera ta conoci esaki ta un proyecto cu a worde presenta pa gobierno for di basta aña pasa, pero pa un of otro motibo el a keda wanta pa tempo largo.

Den su declaracion pa DIARIO, Ministro Lily Beke a splica cu conservacion di nos herencianan cultural a cuminza for di aña pasa caba, door di diferente drechamento y construccion.

E compania Bohama ta esun cu tin e restauracion di Edificio Henriquez na su encargo. Dicho edificio ta formando parti di e diferente monumentonan cu ta conservacion na Aruba. E mandatario a bisa cu e meta ta pa trata di engrandecere e conservacion di nos herencia cultural, pa

asina garantiza cu nos futuro generacion por mira e legado di su antepasadonan, haya sa con nan a biba y cual ta e cultura y custumbenan cu pueblo di Aruba a hereda y cu ta worde trasapasa pa e generacionnan nobo.

Edificio Henriquez ta data di aña 1875 esta 125 aña loke ta nifica cu diferente general a marca nan historia den dicho cas, segun Ministro Beke a splica.

Actualmente tin familiarnan biba na Aruba, cu a yega di biba den e cas aki.

Pa loke ta trata Edificio Henriquez e intencion ta pa e keda cla den seis luna. Di acuerdo cu e planificacion na final di Juni e lo keda cla. Tin tres candidato pa ocupa e edificio aki: un banco, un oficina di gobierno y un oficina di exterior cu ta interesa pa huur e compleho aki un vez cu ta cla.

CAS ECURY:

Banda di Edificio Henriquez tin e Cas Ecury, pa cual e procesonan huridico y financiero pa su restauracion tambe a keda concreta entre Gobierno di Aruba y EEG (Fondo Comun Europeo) pa asina durante e aña aki por cuminza cu

e trabaonan aki.

Cas Ecury (manera a planea for di tempo cu gobierno a cumpra e cas) lo bira un Museo Nacional. Na parti dilanti lo bin un plaza cual lo forma un centro cu diferente monumento rond di dje.

E centro aki lo bin riba tereno di un restaurant antiguo, cu tabata ubica den e mesun area di e dos edificionan menciona, cual na prome instancia e intencion tabata pa conserve, pero door di diferente

candela cu a tuma lugar, y dañonan haci pa e chollernan cu a habita e propiedad, no tabata posible mas pa conserve como monumento y a bira necesario pa basha abao.

Despues di deliberacionnan largo cu e doñonan di e lugar, Fundacion di Fondo di Monumento a logra di tuma e edificio over pa basha abao y eynan ta bin e plaza dilanti Cas Henriquez y Cas Ecury.